

L'acheléye do diâle

Ci drole d'anéye-la, i n'aveut nin falu ratinde li Sint Lambêrt, qui lès gayes, al difin do mwès d' julèt' èstin.n' dèdja al tête ! Tot èsteut timpru èt on-z-aureut yeû twârt di s'plinde... Dès canadas à maque, dès frûts gros, meûrs èt gostants à kékéye, dès chos d' frumint si pèsants qu'on lès-aureut crwèyu près' à tchaîr èt, dès bièsses à têtes, bodéyes vos-ôtes, avou leûs craus bias blancs vias, à n' nin crwêre. Dins lès-uréyes, pad'zo lès ayes, pupont d' ronches, pupont d'ôrtîyes, pupont d' tchèrdons mins dès boyéyes di violètes ! À chaque côp qu'on-z-î èreut s' nez d'dins, on div'neut pêrcé amoureûs à 'nn'aler djouwer avou lès violons su lès twèts ! Do boneûr à n' pus sawè qwè fé. On-z-aureut dî qui l' diâle aveut pètè èvôye foû do payis !

Adon, il èsteut timps po l' Glaude d'ènn'aler bardachî sès gayes. I 'nn'aveut... à n' s'è nin fé one idéye. Chaque gaye èsteut si foû mèseure, qui l' banse a stî bôguîye su mwins' di timps qu'i faut po ratchî s' chique al tête. Mins, po riv'nu à s' maujone, ç' a stî one ôte afaire. Li Glaude aveut tot jusse fait one ou deûs-ascauchîyes, qu'i tanfleut come on boû èt souwer trwès tch'mîjes ! I taurdjeut one miète èt...-z-è raler ! I taurdjeut one miète èt ...z-è-raler. Li banse èsteut si télemint pèsante qui l' Glaude ni saveut avancî qu' à ikèts èt pwîs d'mèrer su l' vôye !

Li Twin.ne, si vwèsin èt soçon, n'aveut jamaîs vèyu l' Glaude si mau atèlé. I s' fieut mau d' li. Tot alant al rèsconte di s' vî sponon, i li a crîyî:

- « *Vo-'nnè-la one manière di roter ? Qwè ç' qui t' pwate là, don ?* ».

- « *É, mon parent, si dji so fourbu come on vî tch'vau, crèvé nauji èt bin arèdji, c'èst cause di ç' nom-di-djo-la d' dâné tchèna d' gayes* ».

- « *Dâné tchèna d' gayes ? Non, ê twè, malureûs ! Djoke tu, sés' ! È-st-i possibe di sâcrèmènter por on pôve tchèna d' gayes ? Dji tè l' va pwârter, mi, èt avou mi p'tit dwègt, co bin ! T'ès div'nu on vî plindaud, vola ç' qu'i-gn-a !*

Mins tot d' chûte, li Twin.ne si rind bin compte quéne tane qui ç'èst. I propôse alôrs' on-arindjemint èt d' fé dès paurts inte zèls èt mète pa pognîyes, dès gayes dins leûs potches, dins leûs calotes po rinde li kèdje pus lèdjère. Tot fiant l' bèsogne, vola l' keûr da nosse Twin.ne qu'èst près' à lauker èt sès-ouys di r'boler foû di s' tièsse. One gaye di nom-di-d'là èst véla au cu do tchèna. Grosse come on-oû, po l' mwins' ! I sondje dèdja à comint scafyî ci gaye-la, pace qui lès gayes, c'èst ç' qui noste ome moûgne li pus voltî èt d' glèter por on si crâne amougnî ! Tot fiant chonance di rin, l' Twin.ne fait l' saîsi :

- « *Ô ! Bin ç'côp-ci, waî, one gaye qui r'chone à on laîd cayau. Èst ç' qui djè l' poreu bin prinde ?* ».

- « *É, rastrind valèt, èt s'i-gn-aureut on trésôr didins, do djane ôr oubin dès-ôrrîyes ?*

- « *Doûcès crwèyances, vwèsin... Sins v'lu r'mète diyamant à gaye, dji trove, tant qu'à mi, qui l' djambon d' gaye, c'èst l' mèyeû dès-eûréyes, bin mèyeû, à m'-n-idéye, qui tot l' avwâr do monde !* - « *Tin, là rin, c'èst twè què l' dît ! Mi, dji vwè bin qu' c'èst-one gaye come gn-a pont d' neûje ! Prind pus rade lès gayes qui t'as dins tèss potches èt dins t' calote... Tè lès pous bin awè cètèllale, c'èst po rin !* ».

- « *Ni m' fé nin bastaud, fieû èt, aude bin ça dins t' caboche on bon côp po tot, dji so-st-on frûtiaud, mi. 'l èst bon, sés', asteûre !* »

Mins au d' pus qui l' Glaude fé l' leup pus gros qu'il èst, au d' pus l' pôve mivét d' Twin.ne djèriye au d'la après l' rin.ne dès gayes. Dji m'va sayî d' arindjî lès bidons, pinse-t-i

- « *Tin, Glaude, si dji t' freu l' bistoke di doze oûs po-z-awè l' gaye, ti n' direus nin non !* ».

- « *Dès-oûs ? Dj'ènn'a à chupe chovéye, mi !* »

- « *Djè l' sé bin qui t' n'as pont canârd, dj'ènn' a onk mi, bin craûs èt si tè l' vous dji tè l' va d'ner !* ».

- « *Dijoz, arache-cayau, poqwè ç' qui ti m' doreus on canârd jusse po-z-awè one gaye ?* »

- « *Taije-tu bièsse, dji n' tè l' va nin rêmouler à renguin.ne, dji m'agrance dèdja di m' fé 'ne bouche crausse èt, dji n'a rin d'ôte à dîre !* »

- « *Èt bin, Mossieû Twin.ne, qui s'agrance dèdja di s' fé 'ne bouche crausse èt qui n'a rin d'ôte à dîre, èst ç' qui por on si crâne amougnî vos m' donerîz one di vos deûs vatches ?* ».

Li Twi.nne siblarit jusse one miète mins i 'n balzine waîre, i dît « ayi » wôt èt fwârt, on ayi qui file come one bale, d'alieûrs.

- « *Dijoz, Mossieû Twin.ne, c'èst bin d' vosse caflorîye vatche qui dj' vos cause mi, pace qui, por on si râre amougnî èt por vosse panse, dji pinse qu'èle li vaut bin, non ?* ».

Tant qui l' Twin.ne èst su dès tchôdès breûjes, li Glaude tire lès marons foû do feu èt l' galaferîye do Twin.ne li mwin.ne à fé mârtchi avou l' djèriaud. I ratchenut èchone èt bouchenut mwin su mwin.

Pwîs, Twin.ne si dâre su s' gaye come on mwaîs tchin, mins s' keûr bat l' bèrloque di binaujeté.

Faut veûy comint ç' qu'i sère si trésôr pad'zo s' casake, à tote fwace su s' pwètrine !

Po fé durer l' plaîji, tot rotant j'qu'à s' maujone, i sondje à-z-aler qwère one bone botèye di vin po goster s' miscoterîye.

Qué bouneûr, pinse-t-i, d'awè one fine bouche, d'awè l' pus grosse gaye do monde èt, fwârt avant, di n' awè nin lèyi s' paurt à ç' laîd mama d' Glaude-la ! Adiè vias, agnas, gadots èt gades, i' gaye vaut totes lès pwin.nes èt tos lès sâcrifices d'one vîye di djin. Do timps qui l' fièsse èst dins s' tièsse, vola noste-ome rindu.

I mèt l' grosse gaye su l' pitite èglume come on « Graal » su s'-t-auté, li vère di vin doûs èst plin, il a dèdja bone bouche, nosse Twin.ne. I solève li mârtia èt crac !

Ayi, po craquer, ça a craqué on bon còp !

Tot d' chûte, one djane fuméye saôte èt on gout d' soufe èpufkine l' place.

Âtch ! Ça sint l' poûri !

Mins, l' pîre, mès djins, ça a stî l' acheléye. One acheléye, vos-ôtes, qui s'a fait ètinde d' long èt d' laudje. One acheléye, vos-ôtes, qui n'aveut pont d' fin ! One acheléye, vos-ôtes, à tchaîr mwârt d' astampé !

Vos-avoz bin vèyu qwè, mès djins, c'èsteut l' diâle qu'aveut stî ègayolé èt, cause d'on còp d' mârtia, vo-l-la r'lachî. I n'a nin fé long feu èmon l' Twin.ne. Po l' sèrvice, pont d' merci ! Il a zoublé pa l' finièsse èt abîye, r'prinde si mèstî.

Tot fiant claper s' bètchûwe quèwe come on còp d' trique, il a fani lès fleûrs, ravèrdi lès ronches èt lès tchèrdons èt disgrochi lès caflorîyès vatches èt leûs bias blancs

vias. Pwîs, sumer l' peû al vole, âm'êtêrnâm' èt, pa t't-avau tot, rîre come po s' foute !

Fin miêrseû, li Twin.ne rimawe co li roumdinadje dèl démonéye vwès qu' aveut bwêrlé à sès-orèyes : « *T'as v'lu mougî l' diâle, bin t' faut mougî lès cwânes, asteûre !* ».

Joëlle Spierkel, li curieûse agasse

www.ecoledewallon.be